



Inatsisartut suleriesianni § 36 naapertorlugu apeqquaqat aallaavigalugu oqallisissiaq imaattoq matumuuna saqqummiuppara:

**Qaanaami kulturimik toqqammaveqartumik immikkuullarissumllu piniariaatsit kinguaariinnut aggersunut iluaqutissatut qanoq ililluta tammatsaalineqarnissaannik qulakkeerinnissinaanerput pillugu apeqquaqat aallaavigalugu oqallinnissamik siunnersuut.**

(Inatsisartunut ilaasortaq Mikivsuk Thomassen, Inuit Ataqatigiit)

Qaanaami piniariaatsit pinngortitamut uumassuilinnullu eriaginnittumik ingerlatagut piujuartittariaqarpagut. Piniariaatsit inuiaqatigiittut ilisarnaatigilersimasagut, ukiorpassuarnilu ineriartortitavut, suaasatsinniillu kingornussimasagut attattuassagutsigit akilersinnaasumik inuulluataarutigineqarsinnaasariaqarput. Piniartuuneq immini aningaasaannarmik nalilersugassaannngimmat, aamma piniagassat qanoq atorneqarnissaannaannik kisimi nalilersugassaannngilaq, kisianni aamma inuiaat kulturikkut kingornussaannut inuiattullu kinaassusaannut attassinissamut attuumassuteqarput.

Maanna piniarnermut aqutsinermut aqqissuussinerput qangarsuaaniilli piniariaatitsinnut qanoq annertutigisumik qulakkeerineqataanersoq uuttoruminaappoq, taamaattorli politikikkut pisassiinerni immikkut isiginiarneqarluni politikikkut aalajangikkanik pisassiineq atorneqarluni. Tamassuma ersersippaa ilisimasatigut kulturitigullu nammineq ineriartortitat atorlugit piniarnerup qanoq ingerlanneqarnissaanit amingaateqarneq. Piniariaatsit immikkuullarissut uumassuilinnik avatangiisinillu mianerinnittuunerup attattuarneqarnissaannik qulakkeerniarinnittuunissamik siunetaqarput, tamannalu immini iluatinnartuuvoq aqqissuussaannermilu iluaqutissannngortinneqartariaqarluni.

Piniarneq aallaaniarnerlu pillugit Inatsisartut inatsisaat 1999-imeersoq<sup>1</sup> arlaleriarluni nutarterneqartarsimavoq, taamaattorli inatsit taanna piniariaatsinut immikkuullarissunut piniariutsinullu eriagisassat qulakkeerniarlugit inatsisiliortoqarsimanani. Taamaattumillu piffiit annersumik piniarnermik inuussutissarsiuteqarfusut aammattaarlu immikkuullarissumik eriagineqartussamik piniariummik ingerlatsisuusut piniartuunerup inuuniapiloorfusinnaanera nalaattarpaat. Tamanna aggerfinit ersarissumik takusinnaavara, iliuseqartariaqarpugullu. Piniartut toqqissillutik piniarsinnaasariaqarput, inuussutissarsiut nuna tamakkerlugu eriagisarput aqqissuussaannikkut nukittuffiginerusariaqarput, taamaasilluni pisassiissutit nungukkaangasa imaluunniit qeritisiviit ulikkaaraangasa piniartoq aqqissuusaannikkut inatsisitigullu aporfeqarneq patsisigalugu naparlisiinnaqqunagu.

Qaanaami piniartut kulturiata immikkuullarissup qulakkeerneqarnissaanut Inatsisartut qanoq periarfissarsiuussappat? Partiit allat Inuit Ataqatigiittulli ungasinnerusoq isigalugu soorlu Avannaata Kommunia, KNAPK, ICC aamma Pingortitaleriffik peqatigalugu Qaanaami piniariaatsit immikkuullarissut pigiinnarneqarnissaannik sulissuteqarnissamik pilersaarusiorsinnaanerup aallartinneqarnissaanut suliniuteqarnissamik pisariaqartitsippat?

<sup>1</sup> Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersoq

Politikikkut suliniut assersuutigalugu piniarnermik inuussutissarsiornerup ataatsimoorussamik misissorneqarnissaanik, pinarnermillu inuussutissarsiornerup piniartunut ataasiakkaanut qanoq ililluni aningaasarsiornikkut pilerinarnerulersinaaneranik aallaaveqarsinnaavoq. Tassanilu aamma Piniarnermut inatsisit maanna atuuttut siunertarineqanngitsumik piniarnermik inuussutissasiummut aporfilersuinersut misissorneqarsinnaavoq.

Piniariaatsit siulitsinnit kingornussavut, inuuniarnitsinnut tunngaviusimasoq oqaluttuarisaanitsinnut tunngavinnut ilaasoq piujuaannartittariaqarparput. Tamanna piniartuunermut nutaaliaasumut assersuunneqarsinnaanngilaq aamma aalisartuunermut nutaaliaasumut assersuunneqarsinnaanngilaq. Aamma inuussutissarsiutinut allanut tamanut sanilliunneqarsinnaanngilaq. Qaanaami immikkuullarilluinnartumik piniariaaseq piniartuunerlu tammatsaalineqarlunilu piujuartinneqarnissaa immikkorluinnaq suliarineqartariaqarpoq.

Nunarsuup issittortaani inuit uumasunut pinngortitamullu atasutut inuuniuteqarsimanerat sulilu inuuniuteqarnerat inatsisiliornikkut sakkortuumik illersorneqartariaqarpoq. Taamaammat Qaanaami kulturimut toqqammaveqartumik immikkuullarissumik piniariaatsit qanoq iliorluta qulakkeerneqarnissaat pillugu partiit qanoq eqqarsaatersornerat erseqqinnerusumik paasisaqarfigiumallugu apeqquteqaat allaavigalugu oqallinnissamik siunnersuut manna saqqummiuppara.

Piniartuuneq kajuminnartuullunilu soqutiginarartariaqarpoq, nunatsinnilu piniartuuneq inuussutissarsiutaannartut isigineqarsinnaanngilaq, inooriaasitulli aamma isigineqartariaqarluni. Qularnanngittumillu tamatta soqutigaarput piniagassaqaasuseq innarlinngikkaluarlugu piniartuunerup nunatsinni ullumikkumit pitsaanerusumik inuussutaasinnaaera.

Taamaatut siunnersuut saqqummiussillunga oqallilluarnissassinnik kissaappassi.